

四庫全書

史部

欽定四庫全書

欽定八旗通志卷七十六

土田志十五

土田教令

崇德元年十月

太宗文皇帝命戶部承政英固爾岱瑪福塔傳

諭曰朕惟穀甚賤傷農甚貴傷民有糧之家輒自居奇必待市價騰貴方肯出糶此何意耶今當各計爾等家口

足用外有餘即以糶賣毋得仍前壅積致有穀貴之虞
先令八家各出糧一百石交市糶賣以充民食至樹藝
所宜各因地利卑濕者可種稗稻高粱高阜可種雜糧
勤力培壅乘地滋潤及時耕種則秋成刈穫戶慶充盈
如失時不耕糧從何得耶

二年二月

諭戶部曰昨歲春寒耕種失時以致穀貴今歲雖復春寒
然農時不可違也宜早勤播種而加耘治焉夫耕耘及

時則稼無災傷可望有秋否則或被蟲災或逢水澇穀
何由登乎凡播種必相其土之燥濕而布其利該管屯
堡各員有不勤加董率致廢農務者罪之

四月

諭羣臣曰今歲告饑凡積粟之家宜與各牛录內困乏者
賣則取值借則取息如此有無相通則民氣自裕若私
埋藏以致朽爛非我國之人也至貧民無力耕種坐使
土地荒蕪食何由賴該管章京宜時加體察令有力者

助之

六年二月先是

命戶部清查各旗牛錄分別貧富具奏部臣覆奏宗室拜

音圖下四十八牛錄俱貧

太宗集衆於

篤恭殿

諭之曰此等貧窮各牛錄豈行陣時獨禁其俘獲耶豈嘗
於衆人之外加派徭役耶抑豈旱潦偏災之獨異於衆

人耶皆因該管各章京等嗜酒曠職董率無方戶口何從而殷富着將各該管章京解任另選才能者任之

七年正月

諭戶部曰凡有糧貸人及無糧求貸者許家長互相稱貸勿得私向奴僕稱貸及私貸與奴僕

八年六月先是

盛京居民稠密部臣議區別散處以弭火災至是都察院承政滿達海奏言時屆秋禾成熟改造廬舍

恐妨收穫俟禾稼登場農功既畢來歲春和再行修造得

旨所奏是時方收穫改建房屋着即停止其有力之家自能修蓋者聽無力者不必催督俟來春農隙再行修造
順治元年題准

盛京地方令照舊織布仍留養蠶屯十處

又定駐防錦州等城漢軍每壯丁五名撥給牛一隻以備耕種

又定莊屯棉花發民間紡績入八分宗室各派匠役令官員領催督課官屯人織布

二年二月戶部傳

諭管莊撥什庫等使曉諭各處莊頭凡民間什物不許攘掠若採買芻糧定於民間開市之日着一人率領同往餘日毋得私行其貿易價值毋致短少務須兩得其平倘有違令恣行者即行處死至各莊田土尤須勤力耕種

七年正月

諭戶部曰年來八旗止憑踏看澇地給米是以不勤農務嗣後踏看澇地永行停止自王以下官員以上准給俸米一年仍令勤修農務秋則種麥耕地春則運糞撥穀務俾以時從事

八年

諭諸王必俟農隙時方許放鷹勿得玩違以致蹂躪田禾

康熙三十年二月

諭大學士伊桑阿阿蘭泰學士邁圖西安南塔海傳繼祖
盛京官屯五十所沿邊丁壯設為屯二十五所移遷於
烏喇念此莊屯及沿邊丁壯居住年久已成聚落今遽
令遷移如此衆多人戶生業蕩然必致苦累仍留於盛
京與遷移於烏喇皆公家之屯其為納賦則一也朕意
此莊屯應停其遷徙於烏喇兵丁每歲派三百名耕種
或一歲以烏喇之兵一歲以捕牲之人輪年耕種亦可
以積穀矣此事所關綦重着學士麻爾圖馳驛往盛京

烏喇令將軍副都統各部堂官悉喻朕意伊等之意若何詳議回奏

是年十二月

諭戶部曰塞外聚穀甚屬要務故耕稼土田以廣積貯為至切也達爾湖之地其田以內府莊屯之人耕之可令總管內務府於各莊屯內遣其丁壯其穀種耒耜及諸田器耕牛皆令預備於三旗內府官員新滿洲護軍披甲之中熟諳農事者擇而遣之呼爾湖之地其田以八

旗諸王莊屯之丁壯耕之其穀種耒耜及諸田器耕牛
咸令預備熟諳農事人員擇而遣之墾闢耕種之時稷
與大麥油麥春麥四種穀皆可藝植稷宜多種春麥宜
少種遣往耕田之人田既耕種畢則酌留耘田之人其
餘人遣還穀既熟則所留耘田之人可以收穫此農人
所食之米於古北口所貯米石中計口而授之西拉木
倫之地其耕田悉照原議遣盛京人員前往俟農畢收
成之後視豐收地方其治田人員該部議敘爾等其議

以聞又

諭內閣曰達爾湖呼爾湖西拉木倫地方耕田所需之牛
着停其捐助於每處遣戶部司官一員帶庫銀照數購
買以給與之

三十三年正月

諭內閣曰黑龍江墨爾根波爾得之地官員兵丁與索倫
達呼爾之人助其耕種亦有年矣若仍前相助力作其
官員兵丁及索倫達呼爾之人皆致勞苦此數年來所

種之穀倘足以備用則集衆力以耕作可以停止着將
軍薩布蘓詳議具奏遣兵部筆帖式一人往

乾隆元年四月

上諭八旗為國家根本從前敦崇儉樸習尚敦龐風俗
最為近古迨承平日久漸即侈靡且生齒日繁不務
本計但知坐耗財賕罔思節儉如服官外省奉差收
稅即不守本分恣意花消虧竭國帑及至干犯法紀
身罹罪戾又復貽累親戚波及朋儕牽連困頓而兵

丁閒散人等惟知鮮衣美食蕩費貲財相習成風全不知悔旗人之貧乏率由於此朕即位以來軫念伊等生計艱難頻頒賞賚優卹備至其虧空錢糧已令該部查奏寬免其入官之墳塋地畝已令查明給還其因獲罪革退之世職亦令查明請旨似此疊沛恩施者無非欲令其家給人足返樸還淳共享昇平之福也現在日與王大臣等籌畫久長生計次第舉行惟是曠典不可數邀亦不可常恃而旗人等蒙國家

教養之厚澤不可不深思猛省自為家室之謀即如
喜喪之事原有恩賞銀兩自應稱家有無酌量經理
乃無知之人止圖粉飾虛文過為靡費或過父母大
故其意以為因父母之事即過費亦所不惜不知蕩
盡家產子孫無以存活伊等父母之心其能安乎否
乎他如此等陋習不可悉數在已不知節省但希冀
朝廷格外之賞賚以供其揮霍濟其窮困有是理乎
嗣後務期恪遵典制謹身節用勿事浮華勿耽游惰

交相戒勉惟儉惟勤庶幾人人得所永遠充裕可免
窘乏之虞況旗員內之老成謹慎者可望擢用外任
上為國家効力辦公下亦可得俸祿養廉以贍給家
口倘伊等不知痛改前非仍蹈覆轍驕奢侈靡虧帑
誤公則是伊等下愚不移自取罪戾不惟恩所不施
且為法所不貸朕必仍前按律懲治不少姑息且朕
今日所寬者即向日虧空官帑驕泰自恣之人也若
不痛自改省謹遵法紀則將來不於伊身必於伊等

之子孫又復罹追比之苦矣又何樂於目前數日之
花費乎凡朕之所以諄諄訓戒者總為伊等預謀久
遠生計八旗大臣等可通行曉諭官兵人等其各敬
聽朕言熟思審計以無負朕之期望

三年三月


上諭八旗之人動輒望賞望借以濟匱乏不知國家經
制有常為政有體豈有無端賞借以博衆人一時感
悅之理且國家之有恩施亦如

上天之有雨澤若雨澤下降而播種不豫力作不勤亦不能望收穫况一時之賞借猶如一時之驟雨可暫而不可常能給而不能足加之伊等又不知撙節愛惜隨手浪費於生計絲毫無補其裨益果安在耶朕實不忍兵民等之癡愚不悟特頒此旨再行曉諭

九年題准直隸天津河間各屬土性宜棗種植最多深冀亦產桃梨至於榆柳楊樹之類河窪鹺地各有所宜令民間於村頭屋角地畝四至隨宜廣

植始足以資利益如有旗地可種樹木之處應令該管各官勸諭旗人亦可多為栽種

以上土田教令



欽定八旗通志卷七十六

欽定四庫全書

史部

欽定八旗通志卷

七十七至
七十九

欽定四庫全書

欽定八旗通志卷七十七

土田志十六

土田蠲卹

蠲賑銀米

優免徭役

蠲賑銀米

天聰元年六月

諭八旗大臣曰各旗所屬之人勤惰不齊貧富亦異夫務農積貯為足食之本而有無相恤實弭盜之原爾諸大

臣務加詳察若力不能耕種而無糧贍養者有兄弟則令與兄弟相依無兄弟則令殷實有糧者養之其為諸貝勒素知才能之人有不能耕種而無糧贍養者須詳察其情告知諸貝勒設法贍養毋俾失所時方大饑諸物騰貴大臣等以嚴懲盜賊入奏

上惻然曰今歲國中因年饑乏食致民不得已而行竊耳詔是歲獄姑從寬典仍大發帑金散賑饑民

順治二年題准八旗墾地每晌給米一石

又題准邊外八旗蒙古地畝被災按饑民名口折給米銀許沿邊糴米毋令進邊

又題准遊牧地方被災人戶每名月給米一斗在張家口者給米古北口者給銀

又題准王貝勒貝子公等府內人役墾地賑米照例支給其投充人帶來地不准給

是年六月免近畿三百里內已圈地上二年分額賦三分之二

六年定八旗每歲倚恃賑給不務農桑嗣後停其
踏勘如遇歲荒王以下有俸官員以上每歲照俸
米倍給

十年題准八旗貧人滿洲蒙古每佐領下給布六
十疋棉花六百觔米一百石漢軍每佐領下給布
三十疋棉花三百觔米五十石

十一年覆准八旗墾地令即賑給到通漕米滿洲
蒙古每佐領下給倉米二百石漢軍每佐領下給

倉米一百石不論有無俸糧該旗員酌量散給

又覆准看守南苑海戶災地每晌給米一斛

十二年

詔八旗災地官員以上停其勘驗甲兵以下勘驗得實仍

行賑賜

十三年題准滿洲蒙古每佐領給米三百石漢軍
每佐領給米一百石着該佐領領催親驗貧戶給
發其官員家人披甲者不准給

又題准八旗被災地畝每晌給米一斛

十四年

諭發內帑銀十萬兩分給八旗兵丁及賑濟畿輔饑民

十八年覆准八旗旱澇地畝遣各部侍郎以下該
旗副都統以上大臣率戶部司官筆帖式至被災
地方該佐領領催指明勘驗若造冊舛錯責在部
員筆帖式冒指地畝責在領催其災傷輕重地勢
高下不詳加踏勘責在差往大臣事發照例查議

是年三月

諭戶部曰八旗水淹田地每田二晌給米一斛近聞食用不敷殊堪憫念着每田一晌給米一斛應給之米候糧船抵通即於船上支給不必等候入倉既省搬運腳價之費又杜倉中揀和糠粃且船隻早得回空其支兌時該管官務嚴加稽察不得疎忽滋弊擾害船丁

康熙元年覆准八旗被水災地每晌給米二斛蝗
電災地每晌一斛

二年十月給八旗被水淹沒地方米二百五十八萬石

三年覆准賑給八旗災地米京通各倉挨給駐防在外者行文該地方官支給

四年定八旗遇災地畝停遣都統等勘驗止令驍騎校領催等詳勘保結送部具題

六年題准各旗報災不得過七月二十日

七年題准各旗災地遠近不一難以徧驗准寬至

八月初十日逾期不准

九年題准八旗災地各該佐領具結報都統差旗員查勘赴部呈告部委官員驗實具題

十一年覆准八旗旱災地每晌給米二斛本折各半其折色照時價支給

十八年定各旗壯丁差徭糧草布疋永停輸納
二十四年四月大學士會同戶部遵

旨議覆直隸順永保河等處圈撥地方應徵康熙二十一

年地丁錢糧已經奉

詔蠲免所有直隸八府康熙二十三年未完地丁錢糧應
盡豁除其順永保河未經圈撥地方及真順廣大
等處康熙二十四年地丁各項正賦俱免三分之
一

二十八年大學士等會議今歲亢旱奉

特旨軫念八旗護軍兵丁已增與一倍錢糧伊等莊屯人
口足以養贍應將護軍兵丁莊屯人口不議外或

窮寡婦及屯居倚田為生者又或家無披甲人止食一鐵匠之糧此等窮人應察明酌量賜卹奉

旨兵丁雖已增添錢糧其窮困之人現在家口尚不能養何能養及莊屯人口可將此等人察明再議

是年九月

諭戶部曰今歲畿內亢暘田畝鮮獲朕所深悉被災人民已加恩蠲賑八旗田莊俱在畿輔重地同屬災傷滿洲蒙古漢軍甲兵皆須養馬原資禾稼以供飼秣今穀既

不登芻豆必致湧貴雖給有月餉銀米可以贍育家口
貧乏兵丁經營草料恐滋困累朕殊用軫念着詳察實
係窮兵無力養馬者開列名數送部自本年十月起至
來年秋成時止其馬匹所需錢糧應加給賜以昭朕一
體愛恤兵民之意作何恩給爾部確議具奏

十月戶部議覆

盛京遼陽

興京屯莊所種田地因亢旱及霜隕米穀不收應免

其納租移咨

盛京戶部詳計所需米穀發銀採買賑濟奉

旨盛京地方今年亢旱米糧不收聞兵丁現在買米而食朕心深切軫念其令戶部侍郎阿山乘驛速往與盛京各部大臣公同察明量其度歲所需令內務府官往取莊上所有米糧散給俾得均沾實惠

二十九年二月戶部遵

諭議奏八旗不能贍養之莊屯人口及窮官護軍撥什庫

兵等之莊屯人口共二萬二千四百二十八人每人給米一石至於孑身寡婦退甲護軍撥什庫及無馬甲止給一兩錢糧者其家口莊屯人口共六萬三千七百一十九人每人亦給米一石得

旨此等人口俱應給米糧可令速給之

九月

諭戶部曰盛京兵丁全恃南畝耕獲及月給糧餉以為資生之計昨歲盛京禾稼不登貧困兵丁艱於粒食曾以

所有屯糧頒發賑救項值軍興遣一等待衛齊蘭布往
調盛京兵丁隨發諭旨令無馬匹者給以官廠馬匹無
行糧者給以莊屯糧米而官兵因踴躍過往倉卒之際
置辦一切軍裝遂支領明年二月分應給俸餉又預支
五個月錢糧刻期進發比厄魯特噶爾丹敗遁盛京官
兵雖未接戰而奮勇敢愾深可嘉悅今若將預支俸餉
復行抵扣則窮乏兵丁必致生計艱窘朕心殊切憫惻
所預給明年二月分應給俸餉及增給五個月錢糧着

免抵扣仍照常支給俸餉以示朕愛養將士軫恤疾苦
至意爾部即遵諭行

三十三年七月

諭戶部曰盛京等處去歲禾稼不登粒食艱窘聞今年收
穫亦未豐稔米穀仍貴倘價值日漸翔湧則兵民生計
恐致匱乏盛京等處地方關係緊要朕心時切軫念宜
預加籌畫作何恩給卹各資生著遣部院堂上官一員
前往自甲兵以及匠役當差人等有力不能餬口者將

人戶數目察明造冊具奏爾部即遵諭行

三十四年五月

諭大學士伊桑阿侍郎朱都納學士宋柱戶部郎中鄂奇
曰副都統齊蘭布等自盛京還奏言今歲盛京亢旱麥
禾不成米價翔貴雖市有鬻粟而窮民力不能糴遂致
重困夫盛京者根本之地今朱都納宋柱鄂奇等馳驛
迅往會同盛京將軍副都統諸臣詳察果窮乏者於去
歲海運米二萬石中動支一萬石計會散給今可食至

秋成此一萬石散給而有餘者平價糶之若此則兵民均有利益又諸地有告糧乏者遣城守尉部貲之賢能者併散給以賑之如一萬石不足散給發糶速具題請旨

八月

諭戶部曰盛京地方比歲荒歉粒食艱難朕心深切軫念原欲躬親巡省詢問疾苦情形徧敷恩澤今歲停止東行而所在貧窶兵丁尚冀朕之臨幸是宜仍加賑卹用

俾資生應作如何加恩爾部議奏又盛京兵丁錢糧兩季支領兵丁於未支領之際每致有稱貸逋負嗣後着按月支給至今歲秋禾聞亦不甚豐茂恐生計漸艱困乏滋甚自今冬以至來秋應作何賑給不致失所共計需糧若干着盛京將軍副都統會同盛京戶部侍郎查明詳加籌畫具奏爾部即遵諭行

雍正五年十二月奉

上諭聞得兵丁等於京通二倉支領米石時每因腳價之

費賣米充用致有不善謀生之人並不計其米之接續輒以賤價糶賣及至缺乏又以貴價糶買此甚無益於兵丁者也現今旗下俱有官房或按八旗設立八局或按滿洲蒙古漢軍旗分設立二十四局將兵丁欲賣之米以時價買貯及其欲買則以平價賣給如此似於兵丁大有裨益至於應派何等人員管理需銀若干萬兩及所得利息作何利濟兵丁之處着管理旗務王大臣等公同詳議具奏

六年二月管理旗務王大臣會議請八旗設立二十四處米局通州左右二翼設立二局京師每局給銀五千兩通州每局給銀八千兩京師各局用旗下官房如本旗無房以別旗相近者取用其通州各局則以入內務府之官房擇兩處近倉者用之京局揀選賢能官二員領催四名令其辦理通局則每翼委官四員領催八名其各局應用寫算之人臣等擇兵丁之能者派委其量米之人亦於

旗人內僱用通州所有二局每翼挨旗各承查一
年設立米局以後將他處私行糶賣者嚴行禁止
每旗派叅領一員稽查如有違禁買賣者從重治
罪或被旁人拿獲將稽查之叅領及都統等一併
議處管米局官員如有作弊侵漁之處令該管大
臣嚴叅治罪如怠玩不以為事至於虧缺本銀將
所虧銀兩着落賠補不能敷數該管大臣賠補俟
及一年將用過銀兩及所得利銀奏請指示辦理

至此項銀兩從何處支領俟

命下之日臣等欽遵施行奉

旨依議銀兩由戶部領取

乾隆元年二月和碩莊親王允祿等奏言據八旗
文稱自設立米局以來有益旗人者半無益旗人
者亦半蓋旗人不來買徒致局中積累過多故臣
等議裁米局蒙

皇上睿鑒以米局裁後恐米價復昂於旗人生計有礙

因降

旨八旗尚應留幾座或三旗共留一座之處令臣等覆
議臣查八旗現有之米局共廿四座其局太多請
將滿蒙漢三旗共留八座其餘俱行裁汰但米局
既裁即不能如前堆積或應暫行照舊辦理俟一
二年後再議裁留其現定三旗共立一座如何辦
理之處請交八旗都統查辦再包衣三旗每旗米
局各一座亦屬過多請裁去二座三旗共留一座

至五城米局原以接濟民人請仍其舊奉

旨依議

是月又奏言廿四座設立之時每座各領本銀五千兩續因清辦利息其本銀有全行交納者亦有未行全交者現在每旗既經裁汰二座各留一座應請仍照前例每座給銀五千兩辦理俟一二年後再將裁留之處核議此項銀兩即將現有之三座米局內銀米核計五千兩之數支給其餘銀兩

交納部庫外將米散給兵丁即將伊等應得項下
留倉抵補其三旗米局擇其寬敞者留之其管理
米局之大臣交當月旗開單請

旨各派一員其現有之滿蒙漢三旗章京內各留一員
其領催馬甲人等即交派出之大臣酌量去留再
查現在米局尚賣細米但買者甚少而每月糴米
多用人工妄費錢糧實屬無益亦應裁汰其米局
事務仍照從前三年一次報銷奉

旨此米局內既有滿蒙漢章京兵丁即著前派之大臣
管理不必另派餘依議

二年閏九月戶部奏言八旗米局現無存貯米石
足供糶賣計與放甲米之期尚隔半月有餘請每
旗米局各撥粳稬米一二千石平價糶賣以濟兵
食

從之

是年十月步軍統領鄂善等奏言八旗米局出糶

米石或有一旗取具佐領圖記為憑然後出賣者
或有一旗並無佐領圖記直行出糶者是八旗所
辦不一且旗人買者少而奸商買者多與米價實
無裨益奉

旨此事交爾與管理八旗米局大臣等會議具奏

十一月鄂善等又奏言米局之設原為兵丁等於
闕米後賤賣貴買恐失生計故特立此官局俾願
賣者賣在官局有不能接續者仍在官局買用期

於旗人大有裨益無如兵丁只圖省便所關米石
若由倉賣至米局車脚浩繁是以就近賣與商人
實得便益再官局之米俱係未舂碓房所售乃多
細米關倉後來買米接濟者皆便於碓房買用此
官局之米所以徒見堆積無濟於旗人欲令民人
買之則又屬奸商射利者陸續買去私行囤積難
於稽查此一向米局之情形也本年近京歉收米
價昂貴蒙

聖主屢念兵民生計特將倉中之米每局給與四千石
恩意至為優渥乃奸商射利者猶衆臣等伏思兵丁所
賴者錢糧每一馬甲所關米石僅可養七八口未
免不足如伊等能自為謀存留養贍之外以其餘
賣與小民餬口是兵民兩得其益如其不能自謀
濫行出賣則雖有官局終歸射利奸商之手究與
兵民無益臣等以為宜將八旗及包衣三旗現有
米局全行裁除任其兵民賣買惟於關米之時將

接買之人嚴加查拿如此則奸商不得堆積米價
亦可平減矣奉

旨所議不准堆積嚴加禁止之處着依議其米局可否
裁除之處王大臣提督八旗大臣等會議覆奏

十二月和碩莊親王允祿等覆奏臣等思米局買
賣米石皆係兵丁每季應闕額數非比交五城所
賣之米其關米兵丁憚運局腳價之費趨便賣與
商人實難禁止縱使賣與官局而又有奸商買去

堆積實與兵民無裨合照提督鄂善所奏將八旗
已衣三旗現在所有九局俱行裁除其局內餘米
交承辦大臣辦理交部奉

旨依議

三年三月奉

上諭現在八旗復設米局原議於應行買米之時動支
庫銀收買目今米價昂貴旗民糴買不免拮据必須
及早平糴方有裨益朕意欲於每廠給發銀米各半

令其即行開糶酌量辦理其應如何給發銀米之處
着大學士議奏

大學士鄂爾泰等奏言八旗米局今既照舊開設
但現在米價昂貴若每廠給銀五千兩一齊收買
恐轉致騰涌若給與米石平糶又恐一時糶盡仍
不能平減時價是以令於應買米石時由庫支領
銀兩收買今奉

諭旨令每局給與銀米各半以資平糶實屬允當查原

議給銀每局為數五千臣等酌議每局給銀二千五百兩稜米二千石令其照市肆數目量為降減糶賣以平市價其所領銀兩及賣米銀兩應如何陸續收買接濟之處應交管米局之大臣酌量辦理至所領米石遇有豐收之年作何還倉抵項亦俱令管米局大臣臨期妥辦具奏奉

旨依議

四月奉

上諭八旗設立米局原以惠濟貧人從前請裁米局者
係八旗大臣現在議覆米局者亦是八旗大臣從來
朝廷立政有治人無治法必須辦理得宜方為有利
無弊若米局既設而奉行不善有失初設之美意則
雖屬良法終何益之有着傳諭八旗管理米局之大
臣務期悉心籌畫隨時調劑毋得稍有疎忽致生弊
端現今管米局之大臣有止派副都統者該都統亦
當留心查察不可謂身無責成膜視公事

七月戶部議覆正藍旗蒙古叅領七十八奏米局
剩米無多請照上年每局給稜米二千石平糶所
賣錢文即令米局換銀交部以平錢價等語查上
年內務府并八旗共計九局共發米一萬八千石
本年添設共二十七局若仍照上年每局給米二
千石須發米五萬四千石為數太多臣等酌量每
局應各撥稜米一千石及時糶賣以濟民食所賣
錢文即交米局換銀解部仍將價值報部查核奉

旨依議速行

九月奉

上諭今年畿輔地方收成有歉薄之處而口外年穀順
成頗稱豐稔昨已降旨准商人出口往來販運以資
接濟今思京城米價現在不能平減來春青黃不接
之時恐益加騰貴着派出戶部司官赫赫那爾善內
務府官員王常保王慎德於張家口古北口二處每
處各二員攜帶內庫帑銀前往會同地方官將米豆

雜糧等項照時價採買運送來京交八旗米局平糶
使都門兵民得資外來之米以供饗殮而口外有餘
之糧亦不致耗費於燒鍋等項無用之地實屬兩有
裨益其應齎銀若干并作何輓運之法着該部速行
詳悉妥議具奏

戶部議奏有商人范毓麟自言口外買米係伊熟
練之事張家口外現有伊之夥計人等斷無貽誤
請令范毓麟自行採買回京較之官買自然節省

其派出司官四員應前往古北口喜峯口熱河一帶分頭採辦不拘何項米穀照市價購買陸續運京分給八旗米局臣伏查口外今歲雖屬豐稔而彼地需用之外其所餘之多寡與市價之長落亦難預定且採買需用價值並運腳等費必須較之五城米價有減無增方可廣行採買運京平糶臣等酌議請先動內庫銀六萬兩交與派出之員齎赴彼處相度情形如果較京城平減可以多行收

買即將應需銀數報明臣部臣部即奏請動撥派員送往以資採辦至如何輓運之處查邊口地方山路崎嶇較內地輓運未免繁難或用附近莊頭車輛或僱覓駝隻車腳應令派往之員酌量如何便易即會同地方官辦理其腳價等費俟事竣日報部核奏至所買米糧陸續運送到京若在京無接辦之員恐交收遲滯車輛人夫不無羈候之虞應奏派內務府司官一員戶部司官一員令其將

張家口古北口等處運來米糧在京接領轉交八旗內務府米局並預令籌備堆積之處以便隨到隨收統俟到齊之日再將作何定價何時發糶之處請

旨遵行奉

旨依議速行

十一月戶部奏言派往古北口等處人員陸續運到米豆二千餘石據該員赫赫等呈稱先帶銀六

萬兩採買米糧四萬六千餘石尚可買米一萬餘石加運腳尚不敷銀三萬兩請撥庫項派員送至以資及時採辦等語又據商人范毓韻呈稱買得雜糧二萬六千石現今運交官局小米四千餘石請領銀三萬兩再行陸續償運等語以上二處請領銀六萬兩仍於臣部庫貯銀兩照數給發統於事竣核銷惟是八旗兵丁仰給

天庾均係計口授食按月關糧非如五城居民專賴

糴食市米可比且查旗人平日多食老米民人平日多食雜糧今若將口外採買之糧全數交八旗米局糴賣微論現今大檔闕放兵丁尚有應領甲米可資食用竊恐高粱等項旗人尚未食慣來買者亦屬無幾若令外城居民赴內城糴糧未免旗民雜沓不無擁擠守候之虞臣等酌議所有黑豆一項應全數運交八旗官局糴賣以為飼喂馬駝之用其已經交局高粱小米亦即存貯各米局在

內城發糶外至嗣後運到雜糧俱交五城於城外
關廂收貯以待來春平糶如此則廠座既多流通
自廣於乏食貧民似有裨益再查五城向無貯米
倉廩應飭各城御史尋覓閒房暫行收貯俟明年
青黃不接之時再行定價發糶奉

旨這所議甚好著照所請行

十二月鑲紅旗漢軍都統恒親王等議覆和親王
所奏收糶事據稱嗣後每季開倉時若遇米價少

貴請令八旗官局暫停收糴任從軍民私相買賣
彼舖戶雖衆必不能將兵丁所賣米石盡行收買
官局既不收糴則賣米者少而米價或不致昂貴
矣如果米價既平令官局亦照市價每日數十石
至百石陸續糴貯官局以為米價昂貴之備等語
查每季開倉八旗及內務府兵丁應闕之米計數
十萬石除伊等存留食用外其糶賣者亦不過三
分之一若官局暫停收買先儘舖戶糶買則射利

奸商貪心無已勢必盡行收買堆積以待闕倉之
後高擡時價維時欲平其價而官局並無積米何
所藉以為平之之具且開倉之際米價低昂前後
不一既先儘鋪戶糴買俟米價平易再准官局糴
買彼時不惟八旗及內務府各局一時齊買而奸
商富戶又必乘賤爭買米價必又復昂貴矣再查
八旗米局每季所買不過八九萬石而兵丁所賣
之米尚屬有餘其中雖有鋪戶兼買亦未必致昂

市價應請嗣後開倉時八旗內務府米局准其酌量多寡陸續糴買而鋪戶民人雖准糴買不得過五十石之數倘有不法之徒堆積過數者嚴行查拿治罪至所稱每日只准出糴一二十石不許肆行糴賣等語查官局收買米石原以接濟兵民若一時遽行出糴一遇貴價則接濟無由米價勢必難平臣等現將上季所買之米陸續漸糴務期得接下季開倉之時不使間斷以備均平其肆行出

糶之處實所當禁奉

旨依議

八年九月奉

上諭盛京戶部莊頭每年交納糧石預備

陵寢祭祀各項公應外其餘交收入倉以為撥給各處匠役口糧之用今朕恭謁

祖陵親詣盛京軫念各莊頭終歲勤苦輸將無誤着將乾隆八年分應交倉糧一萬餘石加恩寬免其各處匠

從口糧着於舊存倉糧內撥給再各莊尚有乾隆七年分未完米豆草束俱着該部查明一併豁免以示朕優卹旗莊至意

十五年十一月奉

上諭現在京師米價雖不甚貴然較之常價未免加增八旗設立米局收買米石原視市價之低昂以備平糶之用今米價既不無稍昂若再行收買恐目下未受平糶之益轉滋食貴之虞着再行停止如明春應

需平糶之時令管理米局大臣酌量需用米數定議
奏聞由倉支領

是月奉

上諭近來京師米價較上年冬月稍昂已降旨八旗米
局停其收買但市價一時尚未平減時屆隆冬小民
艱於餬口着將八旗米局現在收買存貯米石照時
價酌減發糶如有不敷着於京倉支領五城由京倉
各領米一千石照八旗定價一體設廠平糶交該御

史等嚴行稽查毋令閭戶乘機射利察出從重治罪
該部即遵諭行

二十一年正月奉

上諭據署黑龍江將軍綽爾多奏齊齊哈爾黑龍江默
爾根呼蘭等處八旗水師營驛站官兵人等各年未
完糧石並本年借給口糧共十五萬五千餘石請分
年完交等語齊齊哈爾等處連年被災歉收兵力自
多拮据兼之調派隨征甚為出力朕心深為軫念着

將齊齊哈爾黑龍江默爾根呼蘭等處節年未完借欠糧石並本年借給口糧十五萬五千餘石俱着加恩免其完納以示優卹該部即遵諭行

二十七年四月奉

上諭朕巡省江浙畿輔所過地方應徵賦額前已特頒恩旨分別蠲免但念各屬尚有節年民欠未完之項分年緩帶錢糧尚應按數徵收茲迴鑒沿途體察民懷宜敷恩澤着再加恩將乾隆十二年至二十五年

大興靜海龍門宣化懷安萬全西寧懷來蔚州四旗
等十州縣廳未完地糧銀七千一百餘兩改折銀六
千六百餘兩屯糧一萬六千餘石概予豁免其自十
九年至二十五年各屬因災緩帶地糧銀八萬六千
七百餘兩改折銀九千一百餘兩屯糧一萬三千餘
石並着加恩於本年起限再分作三年帶徵俾民力
益紓得資耕耨用稱愛養黎元至意該部遵諭速行

三十四年二月戶部議

盛京戶部侍郎瓦爾達奏乾隆三十三年承德遼陽
海城廣寧等四州縣夏秋被水其戶部所屬被災
官莊七十五座准其照例賑卹應交本年糧石鹽
勛亦准其照數蠲免務使被災丁莊均沾實惠如
有冒銷剋扣等弊即行恭究奉
旨依議速行

三十八年正月奉

上諭各直省秋成普慶豐收即奉天各屬亦臻大有始

和之布毋庸更沛恩膏惟念盛京各城旗人節欠餘地租銀自乾隆三十一年至三十七年計六萬餘兩原係該旗人等節年拖欠至此年豐力裕自應踴躍輸將第積欠一時並徵恐不免稍形拮据着加恩分作六年帶徵俾完公更得從容而生計益臻饒裕以副朕體卹嘉惠至意該部即遵諭行

四十三年八月奉

上諭朕恭謁

祖陵禮成現降旨將奉天所屬府州縣乾隆四十四年地
丁正項錢糧通行蠲免所有各莊頭及旗地應納糧
石草束等項自應一體加恩以敷渥澤著將盛京戶
部各莊頭本年應交倉糧一萬餘石免其交納所有
各處匠役應需口糧著於舊存倉糧內撥給其盛京
興京遼陽牛莊蓋州熊岳復州金州岫巖鳳凰城開
原錦州寧遠廣寧義州等十五處旗地本年應納米
豆草束亦着免徵一半俾旗莊均沾嘉惠該部即遵

諭行

以上蠲賑銀米

優免徭役

天聰四年七月戊子

上與諸貝勒議

太祖庶福金所生之子阿拜塔拜巴布泰巴布海賴慕布

又弟之子吳達海塔津拜尹圖鞏阿岱舒爾赫哈

木加族叔吳霸席庫撒哈席庫機爾塔席庫又姑

母瑚雷與姨母之子栢爾肯卜賴吳把泰吳齊勘
分岱席爾談發庫又勒克舒子孫及顏布魯等俱
免徭役

八年正月癸巳先是

興祖真宣帝子六人是為

六祖其子孫有官職者免其徭役無官職者不免至是

上命分別優免之

長祖德世庫之裔吳山卓爾會德倍羅托禮卓班凱穆布

薩岱察翰勞岱扎齊喀拉漢岱塔漢岱內立鄂爾
輝孫泰溫泰譚布瓦爾喀布山席翰席圖伊圖伊
爾門喜福吳丹除本身外仍各免三丁

二祖劉闡之裔塔哈布塔哈納特思護塔爾布額布格席
賴薩壁翰科爾坤葉思護富喀公阿除本身外仍
各免三丁以朱滿無甲除本身外仍免二丁

三祖索長阿之裔勞察布達禮恭格特鐘特阿克善握赫
佛爾赫顧爾哈來穆布蘇拉圖他爾圖克德庫爾

蟾黃代拜尹達禮寧淡雍科穆成格郭科岳科格
特布泰布爾山阿爾山邁圖巴漢昂阿喇巴哈塔
額進祜邁龍什祿赫圖蘭圖祿外庫碩里藍泰喀
喇孟特穆布岱布爾哈哈世覃富喀碩塞錫爾門
格禮商鑑牛旺堅杜什薩穆哈圖喇塞郎邱索尼
和尼鄂岳要覽碩博會碩羅碩里喀哈思祜安鈕
邱蘭姚塔羅得格阿哈尼堪碩塔顏諸鄂謨諾富
克他喇金塔喇穆臣圖陳達布篤禮鐸郎阿溫泰

諸西伯圖克錫圖額伯圖克布圖朱孔格塔他布
赫塞巴蘭色翰普爾噴海蘭雅布蘭馬星阿鄂星
阿薩哈爾察布爾吉阿爾海巴布賴喀喇班布羅
碩握赫羅薩乖達布克達庫阿度魯得奧哈范善
貴和鐸璫得索得吳班吳喇納克春莽吉圖除本
身外仍各免三丁

景祖翼皇帝之裔噶布喇伊賴脫穆多理額爾德額塞阿
拉密阿塞阿濟賴習賴脫特托業穆濟穆成格何

特莽嘉噶思哈席漢除本身外仍各免三丁以瑪
爾漢瑪福塔二人無甲除本身外仍各免二丁

五祖包朗阿之裔撒哈席庫機爾塔席庫吳霸席庫蘇達
喇吳習譚薩哈璉郭河齊蘇達喇之子穆成格機
爾塔席庫之子穆成格除本身外仍各免三丁

六祖寶實之裔瑪克達屯布祿代尹柱喀蒙愛阿爾布昂
古蚌愛羅托理除本身外仍各免三丁凡與父同
居者止免本身

是月癸卯衆漢官赴管戶部事貝勒德格類前訴
稱我等向蒙

聖恩每一備禦免丁八名止免其應輸官糧其餘雜差仍
與各牛录下堡民三百十五丁一例應付竊思我
等本身照官例贍養新人較民例更重所免八丁
復與民例一體當差本身又任部務所有差徭從
何措辦徭役似覺重科况生員外郎尚有免丁望
上垂憐將所免八丁准照官例當差餘丁與民同例德格

類奏聞

上遣巴克什龍什希福察訊差役重科之由奏稱所訴皆虛惟前此買婦女配給新人衆皆一體出價未經給還衆遂藉以為辭耳

上命將原價發還

諭管禮部事貝勒薩哈廉曰此輩皆忘却得遼東時所受苦累而為此誑言耳若不申諭使之豁然曉暢則此些少之費動為口實矣於是薩哈廉奉

上命傳集衆官於內廷傳諭曰爾衆漢官所訴差徭繁重可謂直言無隱若非實不得已豈肯迫切陳訴然朕意亦不可隱而不言當從公論之朕意以為爾等苦累較前亦少休息矣初爾等俱分隸滿洲大臣所有馬匹爾等不得乘而滿洲官乘之所有牲畜爾等不得用滿洲官強與價而買之凡官員病故其妻子皆給貝勒家為奴既為滿官所屬雖有腴田不獲耕種終歲勤劬米穀仍不足食每至鬻僕典衣以自給是以爾等潛通明國

書信往來幾蹈赤族之禍自楊文明被訐事覺以來朕姑宥爾等之罪將爾等拔出滿洲大臣之家另編為固山從此爾等得乘所有之馬得用所畜之牲妻子得免為奴擇腴地而耕之米穀得以自給當不似從前之典衣鬻僕矣爾等以小事來訴無不聽理所控雖虛亦不重處是皆朕格外加恩甚於待滿洲者也至於困苦之事間或有之然試取滿洲之功與爾等較之果孰難孰易乎滿洲竭力為國有經百戰者有經四五十戰者爾

等曾經幾戰乎朕遇爾等稍有微勞即因而擢用加恩
過於滿洲若與滿洲一例較傷論功以為陞遷則爾今
之為總兵者未知尚居何職也爾漢官皆謂滿洲官員
雖嫻攻戰貪得苟安不知憂國急公我等戰攻雖不及
滿洲而憂國急公則過之及覽爾等章奏豈皆憂國急
公者耶爾等另編固山之時咸云拯我等於陷溺之中
不受滿洲大臣欺凌雖肝腦塗地不能仰答上恩於萬
一今覽爾等所訴之詞何頓忘前言乎爾等訴稱苦累

甚於滿洲盍向熟諳差役者問之若以滿洲相較輕則有之甚則未也古語有云有家者能養賢則取國而國可得有國者能養賢則取天下而天下可得此爾等所素知也是以朕及貝勒之家各量所有均出之以養

上天畀我之民此即古聖人所謂養賢以及萬民之義也今爾等所輸不過大凌河數人贍養之資遂出怨言何其言行不相顧耶朕謂爾等博知典故雖非聖賢必有通達事理者由今觀之殆不然矣使爾等果能達於事

理必謂朕及貝勒尚散財無吝我等隨衆輸納豈為苦
耶他國之主皆歛民間財賦以供一己之用有餘方以
養人我國賦稅朕與諸貝勒曾有所私用乎我國民力
朕與諸貝勒曾有所私役乎取國賦而糜費於家役民
力以修治其室不以國事為念止圖一己便安爾等自
當諫朕今朕為國家朝夕憂勤荷

天眷佑殊方君長頭目接踵來歸猶恐不能招致故解衣
衣之推食食之然一切賞賚之需皆自八家均出何曾

多取一物於爾等乎禮部亦有漢官試往問之八家每年出羊若干貂裘野獸酒米筵宴若干禮部官員豈不明告於爾乎至國中年歲偶歉八家即均出米粟賑濟貧民朕與諸貝勒又散給各固山滿洲蒙古漢人贍養之其所附之蒙古漢人瓦爾喀呼爾哈卦爾察以及舊滿洲漢人蒙古等凡貧窮者則又給與妻室奴僕莊田牛馬衣食贍養何可勝數此皆爾等所明知者爾等果憂國急公其間縱有愚昧無知自言其苦者爾等猶當

勸諭之且熟計經費所需有若干孰多孰寡何不細思
之朕思我國雖貧爾等如此亦足矣欲令爾等與滿洲
一例應差尚恐致累今爾等反言苦累過於滿洲滿漢
官民雖有新舊皆我臣庶豈有厚薄之分乎滿洲出兵
三丁抽一今令爾等亦與滿洲同例三丁抽一為兵爾
等以為何如乎且滿洲之偏苦於漢人者不但三丁抽
一也每牛錄下守臺淘鐵及一切工匠牧馬人固山下
聽事人役等所出不下三十人而當差者凡十有四家

又每年耕種以給新附之人每牛录又出婦人三口又耀州燒鹽獵取禽獸供應朝鮮使臣驛馬修築邊境四

城出征行獵後巡視邊牆守貝勒門及派兵防守巨流

河即句驪河在在需人皆惟每牛录是問又每牛录設哨馬

二匹遇有倒斃則均攤買補遇征瓦爾喀時又各喂馬

二三匹從征每牛录復派護軍十名兵丁二三名往來

馳使差回又令喂養所乘馬匹遇各國投誠人至撥給

滿洲現住屯堡房屋令滿洲展界移居又分給糧穀令

其春米釀酒解納每年獵取獸肉分給新附之人又發帑金於朝鮮貿易布疋仍令滿洲負載運送邊城滿洲又有害水之役每年接新附之呼爾哈於教場看守皮張運送薪水朝鮮蒙古使至駐瀋陽護軍章京各出一人運給水草若夏月至更有採給青草之役又每年採參併負往朝鮮貨賣每固山以一戶駐英格地方巡緝蹤跡又以一戶駐瀋陽渡口看守船隻此皆滿洲偏苦之處若不向爾等詳切言之爾等亦未必深信今滿漢

均屬一國人民爾等竟不知差徭之少倍減於滿洲而滿洲差徭之多實踰爾等三十餘項也爾等試將朕言與爾等所言從公忖量果爾等偏苦乎抑滿洲偏苦乎有所欲言直切言之可也諭畢總兵官石廷柱馬光遠王世選及副將恭將遊擊各官奏曰控訴之事我等不知皆衆備禦所為遂將為首八人執之薩哈廉曰爾等既云不知當貝勒德格類遣布丹往問時何云知之又何為將苦累之事備呈於部耶衆

官對曰各備禦向我等不曾言差役重科但言欲
訴幫丁八人之事故布丹來訊我等答曰知之至
具呈之事乃龍什布福令我等將所有差徭備細
開寫我等無知故爾開送奏聞薩哈廉具以奏

上

上曰諸臣既云不知所執備禦八員可並釋之倘治其罪
後有苦累亦更無敢言者矣各官及所執備禦皆勿令
謝恩若謝恩則是欲罪而復赦之也各官復奏曰臣等

雖未同訴然不能開諭於先復不能禁止於後此
心惻然如醉如夢臣等罪無可逭伏念

上及八家貝勒尚爾卹養外國珍賜無吝凡遇迎送宰牲
設宴曾無虛日臣等更有何言臣等以瀕死之身

蒙

上生全另立固山得叨寵遇凡此衣食奴僕馬匹孰非

上之恩賜果計功之大小頒行爵賞撥給人丁不特官爵
非所敢望更有何物是臣等所應有者今臣等上

等之家不下千丁下等之家不下二十餘丁似此
恭養之恩雖肝腦塗地實難報稱萬一也

是月遊擊祝邦成

天聰三年十二月
攻明薊州殲於陣

之妻請免其

家數丁差徭管吏部貝勒多爾袞以奏

太宗諭曰此功臣之妻准免八丁以後凡功臣已故無兄
弟子嗣承襲而其妻尚存者准照官職免其丁之半著
為令

崇德三年八月優免舉人丁役先是天聰三年

諭曰朕今欲振興文教以昭作人之典諸貝勒及滿漢蒙古之家所有儒生俱令考試取中者則以丁償之遂

命諸臣校錄得二百人各免二丁差徭八年四月又合滿洲蒙古試之取中舉人十六名各免四丁至是復取中十名各

授牛录章京品級免四丁其生員授護軍校品級已入部者免二丁未入部者免一丁

九月定優免人丁例無世職固山額真承政准免

十丁梅勒章京內大臣叅政准免八丁甲喇章京
一等轄理事官准免五丁牛录章京二等轄副理
事官准免四丁三等轄准免三丁多羅貝勒三等
轄准免二丁

以上優免徭役

欽定八旗通志卷七十七

欽定四庫全書

欽定八旗通志卷七十八

典禮志

謹案古者大經大法皆謂之禮故周官六職傳於
禮家而左傳載韓起之言稱易象春秋為周禮家
語記孔子之言亦以小正為夏禮坤乾為殷禮不
止儀禮為古經也史家所記則典章文物為多矣
禮書始見於史記泛論其理焉未及乎制度也

漢書禮樂志序述始詳沈約宋書以後遂為史例

案晉書禮志在宋書前然實唐人所作三國志又無志則正史專名禮志當始于宋書後來

圖經輿記亦間立典禮一門然所載皆天下之通制不應偏屬於一方故撰地志者多刪此一門以省冗複蓋著書之體例應如是也惟八旗通志事
事皆關

國典凡八旗之制度即

聖朝一代之制度非郡志邑志所可比併非省志所可

比舊志立此一門於義至當故今亦採掇新令以補葺舊文蓋我

朝朱果發祥

帝出乎震實唐虞以來肅慎氏之故地相沿舊俗古禮多存即以燕饗一事而論列茵而坐即古禮之布席割牲而燕即古禮之折俎殷烝此由質文漸變中土日趨於浮華而三代遺規轉以風俗淳樸而未改也暨我

太祖高皇帝

太宗文皇帝受

天明命

聖

聖相承修舉典章益為明備

郊社

宗廟之儀

誥勅

冊封之典載內三院之簡牘者班班可考

世祖章皇帝撫有廣輪監殷監夏因革損益持其大中

聖祖仁皇帝

世宗憲皇帝以及我

皇上更稽古之義因時之宜遞參詳而潤色之彬彬然
百度咸熙與三五而比盛凡

大清會典

大清通禮與禮部則例之所載莫不州分部居綱舉

目張足垂萬世之法守今恭錄其關於八旗者條
分件繫而參以近數十年之案牘排比考證務使
端委釐然至

欽定滿洲祭天祭神典禮溯

開創之初規定繼承之永式至誠至敬尤見昭事之本原

謹仿杜佑通典全載開元禮之例具著於篇作典

禮志

典禮志一

王公儀制

王公冊封
王公俸祿

諸王冊封
王府慶賀

公主冊封

王公

冊封

凡封爵崇德元年定

顯祖子孫考論功德列爵九等一等為和碩親王二等為

多羅郡王三等為多羅貝勒四等為固山貝子五

等為鎮國公六等為輔國公七等為鎮國將軍八

等為輔國將軍九等為奉國將軍其餘俱為宗室

又定

皇子係庶妃所生者封鎮國將軍親王側室妾媵所生子封輔國將軍郡王側室妾媵所生子封奉國將軍有功績者量加封授出自

欽定

又定

中宮所生女為固倫公主

妃所生女為和碩公主親王女為和碩格格郡王女

為多羅格格貝勒女為貝勒多羅格格貝子女為
固山格格公女為公格格若

中宮撫養下嫁者亦稱為和碩公主

順治十年題准宗室分爵十等親王一子封親王
餘子封郡王郡王一子封郡王餘子封貝勒貝勒
子封貝子貝子子封鎮國公鎮國公子封輔國公
輔國公子授三等鎮國將軍鎮國將軍子授三等
輔國將軍輔國將軍子授三等奉國將軍

以上鎮國輔國

奉國將軍初封俱三等
後遇加封至二等一等奉國將軍子授奉恩將軍

奉恩將軍子孫世授奉恩將軍

又定親王一子封世子嗣親王郡王一子封長子

嗣郡王輔國公一子授輔國公餘如前例

十七年定親王女和碩格格漢文稱郡主世子郡

王女多羅格格稱縣主貝勒女多羅格格稱郡君

貝子女固山格格稱縣君八分鎮國輔國公女

稱鄉君未入八分公以下女俱稱宗女不授封

又定親王世子郡王正室漢文稱親王妃世子妃
郡王妃貝勒以下輔國將軍以上正室稱夫人奉
國將軍正室稱淑人奉恩將軍正室稱恭人
十八年定貝勒貝子庶夫人子授奉恩將軍
康熙六年定

皇子滿十五歲宗人府具題請封其爵級出自

欽定

康熙二十三年八月宗人府議奏諸王之子減等

冊封應將親王一子

冊封為世子候襲親王其餘諸子皆授為貝子將郡王

一子

冊封長子候襲郡王其餘諸子皆授為鎮國公貝勒以

下皆有減等授封之例仍應照現行例行得

旨親王諸子著授為貝勒郡王諸子著授為貝子餘如所

議

凡授封崇德元年定王以下將軍以上俱由內院

官具奏引至

崇政殿前行授封禮公主王妃等遣官授封

順治十三年十月禮部奏准會典開載親王嫡妃
不存妾子已襲封親王者其妾准封繼妃給與封
冊其諸王以下奉國將軍以上大福晉嫡妻病故者其
側福晉及妾准立為嫡將姓名送部照例給與封

冊

誥命

卷七十八
順治十四年題准親王郡王嗣封者傳至宗人府
禮部堂官宣授

冊寶該嗣王跪受貝勒以下奉恩將軍以上傳至宗人
府宗人府官頒給

誥命俱行跪受若年幼者送至其府宣賜

康熙十二年題准凡封親王世子郡王及親王妃
世子妃郡王妃內外固倫公主和碩公主遺內大
臣散秩大臣為正使內閣翰林院學士禮部侍郎

為副使禮部列名奏請

欽點差宣讀官同往宣讀

制冊寶印文封貝勒貝子及貝勒夫人貝子夫人郡主

縣主郡君遣內閣侍讀學士侍讀翰林院侍讀學

士侍講學士侍讀侍講為正使禮部郎中員外郎

主事為副使內閣中書翰林院禮部有品筆帖式

同往宣讀

制冊文封鎮國公以下奉恩將軍以上鎮國公夫人以

下奉恩將軍恭人以上縣君鄉君由宗人府禮部
給授

誥命

三十六年

諭恩詔加封凡宗室官員入八分公以下奉恩將軍以上
及閒散宗室用為大臣侍衛者照文武官員例依品級
加封

四十五年題准親王以下入八分公以上側室所

生女與嫡出一體封授實為過優嗣後親王側妃
所生女降二等視貝勒嫡女授為郡君品級郡王
側妃所生女降二等視貝子嫡女授為縣君品級
貝勒側夫人所生女降二等視鎮國公嫡女授為
鄉君品級其壻俱照所降品級封為額駙至貝子
鎮國公輔國公側室所生並無應降品級將貝子
側夫人所生女食五品俸壻授為六品鎮國公輔
國公側夫人所生女食六品俸壻授為七品

五十二年

詔宗室官員照四十二年例准給封贈自入八分公以下至閒散宗室授官者該都統查明品級大小有遇前次恩詔已加封贈後陞任換頂帶者准照新任加封其一品封贈三代二品三品封贈二代四品至七品封贈一代八品九品止封本身俱照例咨送內閣撰寫誥命自奉國將軍至旗員侍衛等照三十六年例俱准各加一級未入八分公鎮國將軍輔國將軍及宗室一品二品

官員俱照例送一子入國子監讀書

凡封號順治九年題准我

朝封王以本王素行為號與前代以地名為號者不
同以後嗣王襲封換給新冊暫用舊寶印

賜封號後另鑄寶印換給

十二年題准嗣王襲封者准稱伊父原有封號其
父另給諡號

康熙九年題准已給封號諸王襲封時照現在之

號封給停其改給祖父原號其未給封號應襲親王郡王等議加封號

凡襲爵嗣封者俱由宗人府具題請

旨咨送禮部鑄寶印行

冊封禮

順治九年題准應襲王爵者必以嫡妃子承襲若嫡妃無子方准次妃子承襲

十年題准軍功封授郡王已經子孫承襲者如無

親生子孫准親兄弟及親兄弟之子襲封至親王
之子歲滿照例封郡王者有親生子孫准與承襲
如絕嗣不准承襲

十八年題准歲滿所封郡王原係世襲王爵如有
絕嗣者應否襲封奏請

欽定

又題准王貝勒貝子公將軍等有嫡室所生子照
例襲封如嫡室無子准以庶出之子襲封

康熙三十四年

諭宗室應得承襲之誥命嗣後不必另奏即同襲職本一
併奏聞

乾隆四十一年十月

諭諸王襲爵由軍功晉封者世襲罔替其餘恩封諸王
襲爵時皆應以次遞降凡親王以次遞降者至鎮國
公而止郡王以次遞降者至輔國公而止其公爵均
著世襲罔替

又題准貝勒缺出降一等承襲貝子再出缺時襲
鎮國公再出缺時襲未入八分鎮國公貝子缺出
降一等承襲鎮國公再出缺時襲輔國公再出缺
時襲未入八分輔國公鎮國公缺出降一等承襲
輔國公再出缺時襲未入八分輔國公再出缺時
襲頭等鎮國將軍輔國公缺出降一等承襲未入
八分輔國公再出缺時襲頭等鎮國將軍再出缺
時襲頭等輔國將軍自貝勒遞降至未入八分鎮

國公貝子遞降至未入八分輔國公鎮國公遞降至頭等鎮國將軍輔國公遞降至頭等輔國將軍

即令世襲罔替毋庸再降

以上承襲階級

凡歲滿崇德九年定和碩親王之子以下奉國將軍之子以上男至二十歲女至十五歲列名具題請

旨授封

又定親王以下奉國將軍以上有薨故者其子弟

即准承襲不必俟其歲滿

順治九年正月吏部題

太宗時凡宗室王貝勒貝子公俱視其才德錫封燕京

定鼎後定例郡王以上准襲封貝勒以下不准襲封

其子年至十五者始照所定品爵封授後於順治

八年有年未滿歲授為公將軍者已註封冊應否

授爵至於

太宗時所定之例與後所定之例作何遵行得

旨凡封王貝勒貝子公俱著照得北京後定例行此等年
未滿歲授爵者著於未滿歲以前食俸不必給誥命封
冊亦不必除名滿歲以後照定例除授其所設儀仗官
著裁革

又題准貝勒以下薨故者應襲一子不俟歲滿即
封餘子仍俟歲滿授封若父在得封之子未分居
之先薨故者其子歲未滿不准即封

十八年題准親王之子以下奉恩將軍之子以上

年至十五歲准照應得爵秩具題授封至十八歲具題令其上朝各照爵級職掌隨班行走

康熙二十七年二月宗人府遵

諭議覆親王以下奉恩將軍以上子年十五縣予封爵恐致視為故典罔知激勸嗣後應停止此例俟年至二十辨其文藝騎射之優者列名引

見請

旨授封惟親王以下奉恩將軍以上有薨逝者即准一子

襲爵不俟歲滿得

旨依議如人材超卓者不拘年歲特予封授

雍正三年考試宗室請

旨奉

旨今年係朕初次考試其降級封授處暫行停止照各應

得品級封授

以上承襲年歲

謹案此係

世宗憲皇帝特恩後不為例

凡

冊誥崇德元年定諸王貝勒及王貝勒妃夫人公主俱給紙

制冊授封

順治十一年題准封親王世子及親王妃世子妃

固倫公主和碩公主給金

冊封郡王及郡王妃給鍍金銀

制冊封貝勒及貝勒夫人郡主以下俱給授

誥命

十二年正月禮部奏准向封和碩格格多羅格格
多羅貝勒夫人俱給

誥命今應改給紙

冊

十七年題准凡封貝勒及貝勒夫人郡主縣主俱
給紙

制冊

十八年九月禮部題親王郡王貝勒貝子公將軍

正室及女封

誥冊文內請用滿洲蒙古漢文字樣

詔從所請

康熙十二年題准封貝子及貝子夫人郡君俱給

紙

制冊

又定

冊誥文俱由翰林院撰擬中書科繕寫金

冊由工部鑄造

乾隆二十四年

諭吏部進呈授封誥勅屬意措詞與本人事蹟迥不相
類內閣承用向來定本故套相沿非辭尚體要之義
嗣後各按事實簡明撰擬

乾隆四十七年

諭冊封清語原係通稱並無上下之別嗣後朕親用呈
上者俱繙寫冊表外其冊封皇后妃嬪及王貝勒以

至外藩王等仍用冊封字樣

以上承襲冊誥

凡陞降崇德元年定宗室內有因功陞授者自奉國將軍陞輔國將軍次第論功加封至和碩親王親王有功酌給賞賜其有罪降封者自和碩親王遞降一等至奉國將軍得罪降為閒散宗室其或因大功越陞或因重譴黜革者不論等級

二年定親王郡王貝勒女不論已嫁未嫁者父陞隨陞父降隨降

康熙元年八月

諭禮部宗女封為格格應有定例今見格格封號從其生父父陞則陞父降則降又有從養父封者竟無定例或應從生父或應從養父爾部同宗人府會議畫一定例具奏宗人府禮部遵

諭議王貝勒貝子等有願撫養女者奏准撫養隨養父陞降如未奉

旨私自撫養者仍照生父陞降得

旨格格不便照養父品級俱著照生父品級其從前照養父給過品級者仍著存留

三十六年題准定例王以下品級子不隨父陞降女隨父陞降嗣後得品級之女亦照子例俱不隨

父陞降

以上承襲
陞降之制

諸王

冊封儀

崇德元年定是日諸王貝勒及文武各官俱於

崇政殿前分翼序立內院官捧

制冊印置

殿內黃案上請

旨授封內院官引諸王貝勒依次進跪

殿前宣

制冊官及捧

制冊官於黃案東西向立次第宣

制冊畢捧

制冊印授諸王貝勒王等捧受轉授從官從官跪接王等次第各復原位立

冊封禮畢捧

制冊印官前行王等隨後分翼進至

清寧宮前捧

制冊印官分翼東西侍立鳴贊官贊排班贊進贊跪叩頭王等於

皇帝前行三跪九叩頭禮

皇后前行二跪六叩頭禮畢捧

制冊印官前行王等隨後由

大清門次第出即於門前諸王貝勒相賀照封號爵
位對行二跪六叩頭禮畢各回府第諸王妃貝勒
夫人等各於王貝勒前行慶賀禮畢王府屬員各
於王前慶賀行二跪六叩頭禮貝勒府屬員各於
貝勒前慶賀行一跪三叩頭禮

康熙十二年題准禮部准宗人府咨具題請

旨冊封將正副使官列名奏請

欽點前期一日禮部設節案於王殿之正中設香案於

節案之南設

制冊寶

郡王為印下同

案於節案之東王府儀仗樂器設於殿

前是日禮部設綵亭於

太和門外設

制冊寶節案於

太和殿前禮部官引正副使自

太和殿捧

制冊寶節由

太和門出置綵亭內正副使等隨後俱由中路出至
王府王率本府屬員作樂迎至府門外跪候綵亭
過興隨亭入殿正副使捧

制冊寶節置各案上於節案之東西向立王於節案之
西東向立往封官引王至拜位向節案行三跪九
叩頭禮樂作禮畢樂止王進至香案前跪宣

制冊官於

制冊案之東西向立宣畢正使捧

制冊授王王祇受轉授從官從官跪接副使官捧寶授
王王祇受轉授從官從官跪接王興復位行三跪
九叩頭禮樂作禮畢樂止正副使持

節復

命王率本府屬員作樂跪送

節於府門外

凡封貝勒貝子等有

制冊無印親王為寶郡王為印其行禮同不復載

公主

冊封儀

崇德元年定是日內院官捧

制冊置綵亭內陳設於

崇政殿請

旨授封持節官前導次

制冊亭次封使亭至公主府門公主率侍從婦女迎出
儀門之東向西立設黃案一於府門前封使自亭

內捧

制冊置黃案上由儀門入設於堂前幄內設節案於

制冊案之南封使於節案之東向西立公主隨入於節
案之西向東立封使導公主進至節案之南向北
立行二拜一跪一叩頭禮畢跪宣制冊官展

制冊於節案之東西向立次第宣滿洲蒙古漢字三體

制冊文畢仍置案上公主行二拜一跪一叩頭禮宣制冊官乃自案上捧

制冊授右旁侍女侍女跪接授公主公主祇受轉授左旁侍女侍女跪接公主復行二拜一跪一叩頭禮畢封使持

節復

命公主送

節至儀門外是日諸王貝勒文武各官俱於

崇政殿前分翼序立

皇帝陞殿樂作

陞座樂止諸公主由右門至

崇政殿於

皇帝前行六拜三跪三叩頭禮次進

清寧宮於

皇后前行六拜三跪三叩頭禮次詣

諸妃前各行四拜二跪二叩頭禮畢

皇帝還宮公主各回府第各府屬員於本府公主前行

慶賀禮

順治十一年定封固倫公主和碩公主

同輩者封長公主

一輩者封大長公主均給

金冊又定封郡主縣主郡君均與公主同惟封郡主以

下均授

誥命

公主冊四頁每頁五成金十五兩由工部成造文

由翰林院撰擬

乾隆四十年

詔額駙等向俱照公主封號授為固倫額駙和碩額駙
惟公主所生之子未經定例賞給品級此內如下嫁
蒙古王公之公主等所生之子本各有應得品級無
庸另為辦理嗣後在京公主所生之子至十三歲時
如係固倫公主所生即給與伊父固倫額駙品級和
碩公主所生即給與伊父和碩額駙品級

凡

冊封親王妃世子妃郡王妃貝勒夫人貝子夫人一應

行禮迎送謝

恩儀注俱與

冊封公主禮同受封王妃等各於王等前行四拜二跪

二叩頭禮屬員妻各於妃等前慶賀行四拜二跪

二叩頭禮

凡謝

恩順治九年題准諸王貝勒貝子公等受封謝

恩禮部具題於每月三朝日進

殿前行禮

王公俸祿

公主額駙等俸祿附

謹案王公以下俸祿歷年增減不一案牘不能悉載謹以有增減年月可稽者臚列於前以備參考其增減細數舊志未述今亦並無冊籍惟以現行事例載入以省煩瑣

凡支給

國初各照爵秩撥給田園不支俸祿

順治元年題准歲給俸銀親王一萬兩郡王五千兩貝勒二千五百兩貝子一千二百五十兩公六百二十兩

七年議准歲給俸祿親王銀一萬兩米六千石郡王銀四千兩米二千石貝勒銀二千兩米一千四百石貝子銀一千兩米八百石公銀五百兩米六百石將軍銀八十兩公主米一千石郡主米五百石縣主米三百石郡君米二百石

八年議准歲給俸銀親王一萬兩郡王五千兩貝勒三千兩貝子二千兩公一千兩以上每俸銀二兩給俸米三斛

九年議准給親王世子俸銀六千兩

十年議准歲給俸銀親王郡王仍照舊例餘俱酌量增減貝勒二千五百兩貝子一千三百兩鎮國

公七百兩輔國公四百兩一等鎮國將軍三百兩二等鎮國將軍二百七十五兩三等鎮國將軍二

百五十兩一等輔國將軍二百二十兩二等輔國
將軍二百兩三等輔國將軍一百七十五兩一等
奉國將軍一百五十兩二等奉國將軍一百二十
五兩三等奉國將軍一百兩奉恩將軍七十五兩
以上每銀一兩支米一斛

十一年題准歲給公主俸銀二百五十兩

十二年題准歲給郡主俸銀二百兩縣主一百五

十兩郡君一百兩

十八年題准固倫公主俸銀四百兩和碩公主三百兩郡主二百五十兩縣主二百二十兩郡君一百九十兩縣君一百六十兩鄉君一百三十兩

現行定例親王歲支銀一萬兩米五千石世子歲支銀六千兩米三千石多羅郡王歲支銀五千兩米二千五百石長子歲支銀三千兩米一千五百石多羅貝勒歲支銀二千五百兩米一千二百五十石固山貝子歲支銀一千三百兩米六百五十

石鎮國公歲支銀七百兩米三百五十石輔國公
歲支銀五百兩米二百五十石一等鎮國將軍歲
支銀四百一十兩米二百五十石二等鎮國將軍歲
支銀三百八十五兩米一百九十二石五斗三等
鎮國將軍歲支銀三百六十兩米一百八十石一
等輔國將軍歲支銀三百十兩米一百五十五石
二等輔國將軍歲支銀二百八十五兩米一百四
十二石五斗三等輔國將軍歲支銀二百六十兩

米一百三十石一等奉國將軍歲支銀二百一十
兩米一百五石二等奉國將軍歲支銀一百八十
五兩米九十二石五斗三等奉國將軍歲支銀一
百六十兩米八十石奉恩將軍歲支銀一百一十
兩米五十五石固倫公主歲支銀四百兩米二百
石和碩公主歲支銀三百兩米一百五十石郡主
歲支銀二百五十兩米一百二十五石縣主歲支
銀二百二十兩米一百一十石郡君歲支銀一百

九十兩米九十五石縣君歲支銀一百六十兩米
八十石鄉君歲支銀一百三十兩米六十五石固
倫公主額駙歲支銀二百八十兩米一百四十石
和碩公主額駙歲支銀二百五十五兩米一百二
十七石五斗郡主額駙歲支銀二百三十兩米一
百一十五石縣主額駙歲支銀一百八十兩米九
十石郡君額駙歲支銀一百五十五兩米七十七
石五斗縣君額駙歲支銀一百三十兩米六十五

石鄉君額駙歲支銀一百五兩米五十二石五斗

王府慶賀儀

崇德元年定親王生辰及元旦日該旗都統以下
佐領以上官員齊集稱賀行二跪六叩頭禮郡王
生辰及元旦日本府屬員齊集稱賀行二跪六叩
頭禮貝勒生辰及元旦日本府屬員齊集稱賀行
一跪三叩頭禮若該屬官員無事不至府行慶賀
者治罪

順治九年題准親王郡王貝勒生辰及元旦日該
府屬員聽鳴贊人員贊唱行禮作樂其鳴贊人員
聽各府選擇

欽定八旗通志卷七十八